



焦太史編輯國朝獻徵錄卷之二十三目錄

南京翰林院

掌院事講讀學士

周敘

邢寬

吳希賢

黃瀾

率察

羅倫

王穉

孔目

劉敷

蔡羽

何良俊

目錄終

焦太史編輯國朝獻徵錄卷之二十三

南京翰林院

翰林侍講學士周公敘墓表

南京高穀

學士諱敘字功敘姓周氏世爲吉水人家素業儒由
七世祖應龍下第進士登鄉貢者後先相望有直宋
寶謨閣上疏論賈似道奸邪元授鰲溪貞文兩書院
山長公六世祖曾祖也祖觀由子貴贈兵部員外郎
父岐鳳以明經典教邑庠生佐邑教化及人官至兵
部職方員外郎公生而岐嶷賦性穎悟五歲知敬讓
十一歲有燈下客圍碁兵危將不危太平無事日車

馬華山西之句衆咸異之永樂間以壁經中江西鄉
試榜會試廷試皆寘前列入翰林爲庶吉士承命
作黃鸚鵡賦大見稱賞未幾陞翰林編修母病封章
乞歸省仁宗念以愛親之故特許馳傳南往再乞
封母氏有司援例以父爵崇不宜授乃陳母老疾狀
辭甚切遂獲所請舉爲
太宗 仁宗皇帝實錄及
君臣故事書成賜白金織衣綵段旌其勞陞翰林修
撰丁內艱歸修宗譜及始祖祠家政錄又修鄉約所
言大略取法藍田之規酌鄉黨之宜置正副各一人
每朔望於廟社行焉鄉士子從遊者多所成就復修

宣廟實錄 正統初命司春闈考取士得人充經筵講
官擢翰林侍讀賜遊萬歲山有作以紀其盛首言修
大學勸農桑用人材三事天早上疏言敬天恤民雖
本於人君實在人臣能修職與否分祀南嶽致澍雨
之應主考京闈鄉試陞南京翰林侍講學士修宋遼
金史繼修詩學梯航吉安郡誌唐詩類編應 詔言
時政六事曰新政務擇守令獎風憲嚴操備重邊政
革積弊復言謹始安邦八事今 上皇帝正大位上
書言致治保邦十二事一曰開經筵諭臣僚明賞罰
任將帥專委任慎選舉通漕運增屯種厚耕桑限僧

道公鹽法廣旌褒其意以爲 天子建中和之極成
繼治之效不過勤政恤民所致於是復上中興太平
十四事以勤政親藩新治復邊修武安民考校專人
慎科革弊精漕修書薦賢尚廉其辭多引諭以致諷
深得古人告君之體 上嘉納其誠批答褒美公亦

自感激期以供職自效會有疾致政金陵有妖婦身
著紋異幻惑時流厥甥某由婦驟登太常寺丞賀者
接踵公獨不往曰物與妖非祥且當遠矧可賀耶嘗
謁冶城卜忠貞公廟睹南唐陳公宋忠襄楊公等四
神座列寘左右慨然曰四人者皆死國事何處之卑

下如此也捐貲爲倡構祠令道士主祀事親爲之記
其先世嘗有言宋遼金史當以宋爲正統遼金附書
者公因作書言諸先輩不果用正統中復言諸 朝
詔許其自修公得請日夜纂輯極勞苦不厭 志銘

南京翰林院侍講學士邢公寬傳

南京翰林院侍講學士邢寬字用大直隸無爲州人
自少穎敏力學不輟永樂甲辰廷試初以孫曰恭爲
第一 太宗皇帝以曰恭一暴字耳及見邢寬二字
甚喜遂擢爲第一授翰林院修撰與修 仁宗實錄

成陞侍講正統戊午復修 宣宗實錄賜金織文綺

陞從五品俸己未同考會試尋引疾家居上言民情
十餘事丙寅召至京命復任事丁卯考順天府鄉試

景泰壬申陞南京翰林院侍講學士署南京國子監

事景泰五年六月卒遺官諭祭寬居家孝友與人交

終始不渝且處已坦夷於物無所忤以足疾不良于
行故不得久于內朝云

南京翰林院侍讀學士吳公希賢傳

吳希賢舊名衍以字行更字汝賢唐屯田員外郎祭
之後希賢幼敏異登天順八年進士第選爲翰林庶
吉士時同年李東陽以敏贍齊名遂拜檢討預修

修實錄不
徇私

英廟實錄有貴家子寇姓者密以賄丐希賢致半詞
於其父希賢拒之曰苟爲此他日何以見董狐於地
下耶進修撰陞左春坊左諭德南京翰林侍讀學士
卒於官希賢性豪邁負奇氣於人少許可兩考會試
所得多俊偉士爲文章意新語壯詩亦清俊奇崛每
僚友會集累數百言可立就人服其敏

南京翰林院侍讀學士靜觀吳公墓碑

林俊

文章漢劉揚班馬而下唐二家宋四家其間負豪樹
勇與之角要皆一時翹楚 國朝文明以止昭回下
飾潛溪東里嗣照而聯聲迨天順甲申十八庶吉士
之選盛矣莆與者陳常卿愧齋吳學士靜觀愧齋溫
純爾雅公瓌奇硃蕩限韻命題卽席聯句動輒數百
言豪詞警語如壯濤激浪飛雪走雷雲觸山而電迸
發同時文正公西涯峯回海立公直欲相長雄無畏
風稜孤峻不屑取雷俗當其意略分忘年間有未愜

意氣衰冷言語爲之無味以故躡收巧化率無公
名官幾三十年僅一與實錄金綺之賜由檢討而
撰論德皆九載後遷又三年朝論滯淹以久始侍讀
學士署而南君子以爲得立官之介公雖文字職業
而決擇內定宿所知與無間賤貧每長篇短章伸紙
立副自他時有干購必覈事是非人望實可否不爲
執隆赫儀幣豐腆易素君子以爲植已之嚴其修實
錄也要人子寇者賂優其父半詞公曰苟爲是負所
學負 朝廷他日何以見董狐地下君子以爲得持
論之公兩領會試同考所得多名士會元儲公殖庵

其尤者也諱衍字希賢以字行更字汝賢吳自沈坡徙鼇峯又徙東井父諱熊有鄉行封檢討再封南京侍讀學士母黃有內懿與配朱俱封至宜人公事親友其弟希亨以厚嘗一乞歸省歲時致俸金食品之奇猶惴惴然屬心曲於弟以爲親慰竟肉未寒而家遽落平無他嗜好書卷不釋手有惠本必閱之盡然猶酒未忘情予鄉國特愛思有以忠之公爲予止三月竟以知舊復勸復飲弘治戊申予赴滇南公載餞我於龍灣舟次泪油油若弗勝嗚呼謂竟是訣耶已酉五月二十八日也壽僅五十三

計聞 孝宗念儒學之臣優以祭既之二親亦長逝谷清蔡山之葬子彰符彰武彰憲強爲力今惟彰憲乎在二孫正詔正宗一曾孫某某復始錫類將有泣中書之石而著紹訓之書者矣嗚呼公文章爲莆立幟名家落落擅響者誰與假之年又可知也昔人論退之元賓之至謂不在壽天之間夫元賓之才其誰則限之使公而在文正將不帖帖然文宗之席惜公亦爲莆山川靈氣惜也位遇請極其將誰計哉序而文之碑銘曰莆始自唐文昌發祥日杲星寒有擘其光豹躍龍翔鸞鶴停峙公起詞垣嫡宗是祀蘭臺芸

閣疲神役精奏彼金石羣喧寂鳴公時舊學亦古良
史侍直 帝芴如生於美物不尚全才名忌盛並收
兼容 天子之聖維世孔縮維名孔修維生以弗酬
維後之收

南京翰林院侍讀學士黃公澗傳

黃澗字源績號壺陰少治經業工力倍人於諸經子
史無不獵涉與鄭瑗爲文字友齊名膠庠成化庚子
鄉薦卒業太學爲祭酒丘文莊公所器名益重從遊
者常數十百人傳錄其口授語彙而成帙名爲資講
傳布四方第弘治癸丑進士選庶吉士授翰林編修
以母老告歸十餘年母終復起俱職甲戌同考會試
充 經筵講官進講論語尚書每講未必含規諷有
戒佚遊遠佞人等語 康陵改睿嘉納轉國子司業
遷南京翰林侍讀學士以疾乞致仕卒澗學問淵永

儀度閑雅平生寡慾無媵妾於仕進亦不數數然

翰林院侍讀學士掌南京翰林院事奉訓大夫

華公察墓碑

王世貞

公諱察字子潛常之無錫人也葆胄殷宗錫胤公族
其在春秋右師表君臣之訓迨乎晉季孝子艱不娶
之貞乃後仲息遂昌厥裔宋氏之始肇基東亭及明
播遷於蕩口世藝黍稷爰有資橐公父奉政府君息
轅素封解褐半刺業慕文事耻以訾顯泰陵委和之
運震澤靈秀之匯時惟慶門乃篤生公公生而髻秀
長不膚立攬玉塵以齊潤客訝寧馨挹銀海之滄澄
人誇阿堵誦收三餘之晷論窮九師之辯府君乃延

耆碩以攻玉購英哲而斷金公毫不停綴鋒無抗衡
薄游賢關則林宗之首八俊高步執苑則田巴之屈
千人屬龍飛之紀元歌鹿鳴而登薦江左之珠競靈
蛇誰當照乘燕中之金收蹠躩誤蹶追風驚取一鳴
獻無再別竟登南宮上第射策金馬讀書中秘每試
與吳郡陸君浚明更擅甲乙故太保費文憲公讀其
文而歎曰東南之美盡在是乎公遂與陸君申友于
之分錢通則管鮑慙分氣投則逃琨讓舞九畹齊秀
居然大國之香連城並輝宛爾清廟之器然而珍阻
投夜產忌當門枚馬之吹噓甫上絳灌之詆訶先入

陸既改省夕拜公亦出郎民部淮漕之舳艫飛雪義
絕染指神武之衣冠若雲心安襍被遂以疾予告棲
遲逾年意泊如也府君篤資事之分割晨昏之戀強
公起補掾武庫遷佐職方蓄學與五兵偕富宏識則
九域同朗尋正車駕銳精置郵民鮮告痛國減冗耗
遇恩實授進封府君如其官母鄒爲宜人斯皇朱紱
宗黨榮之會 天子方飭金華而治經術開白虎而
講同異首以舊學兼采時獎改翰林脩撰拜命之日
俾仍五品祿章奏最之辰通理三考遷次銀緋綰曳
之美徊徨弗居博望清華之選逡巡若畏詔美撝謙

特聽所守尋與校 累朝寶訓實錄 宸章之炳烺
若燭何假青藜天祿之恬淡如飴無謝玄白以錄成
進侍讀同考會試皇太子立 詔諭朝鮮賜公一品
服充使者以往父老雜進方欽長卿之見難豪帥歸
誠自繇然明之却賄鴨水傳爲盛事馬韓載在稗史
公旣嫺婉其度加以長慮浹識故太傅李文康公任
在首揆號爲知人適有密勿之陳薦公堪寄端右會
詔青官已齒三至宜備四友公首擢司經局洗馬臺
臣謂公酣醕不當儲輔 天子外伸諍路特寢新除
仍顧輔臣出李啓事曰是尚堪朕輔者胡以不當儲

耶且以酣醕加華某何異謂黃門爲宣淫坐闈伯以
闌入也公旣却軌無通李復削草不泄時始兩賢之
娥眉見嫉班姬所以奉帚尊鱸非美季鷹托而扁舟
予告歸里至是者再昔安石偃蹇朝命棲遲東山自
謂去巢許非遠公築園傍舍名曰嘉遯亦何以異茲
而復見迫府君黽勉北上非其志也俄補故官命主
南畿鄉試貝玉走不蹉之集桃李成無言之蹊前後
二試若少宰茅公宗伯瞿文懿公兩魁天下尚書翁
公陳公劉公殷公侍郎兩朱公畢公曹公凌公輩出
入三事蔚然名臣垂白羔鴈不廢師禮公程式之作

世所指南片辭而模楷攸寓百試而光景恒新未幾
超拜侍講學士握留篆而南素薄宦情更涼物態冥
鴻超蹈之旨默授流言青蠅點污之談翻成知己乃
以微謫露章乞骸駕言倦游篤懷養志 主上愍其
情不之強也公以學士侍二親且五十矣夔夔齋慄
不改孺子之慕蒸蒸克諧遂成太和之風俄而奉政
府君捐館匪法太連之善居有踰濬冲之死孝溢米
時進親慈爲之祝噎雞骨支牀門故虞其毀性亡何
又丁鄒宜人艱哀以歲加禮無老廢乃大營冢域茂
樹楸檟鍾侯之墓田丙舍原氏之南陽新阡方斯後
矣公謂龍蛇屈伸士之恒遇社樹之蔭百尺黃河之
潤九里故計倪五策匪徒謀伯王丹千金聊以足志
四姓之炊煙待煖羣稚之孤煢托儔取若困廩寄之
衽席役助資匱之畝里搜伏匿之田涸轍多潤乎蹄
涔爲漁豈安乎竭澤至於取予歸節豐約因心雖連
雲之暈革爭騫而二簋之豚肩不掩物情頗異行之
自如若乃樹梓種漆樊君雲之迂筴也木屑竹頭陶
士行之瑣算也唯公行之獨得其效公雖家埒素封
服陽陵君之善對名在丹扈安張長公之退節時有
佞相假賜環而爲釣復邁倖帥指推轂以求脂甘語

狎至危機隱括有爲公動者公如不聞間謂所親曰
昔人有投鹽於水以明非惜惜所與也吾守先人體
粥之遺而捐以填狹邪之逕乎且使白首嫠婦丹唇
銜門匪惟失節徒增其醜俄而佞相倖帥相繼淪敗
始服公之遠識公林居凡三十載矯履迅步若士之
狎雲霄柔肌粲顏姑射之凌冰雪高標鮮令簡度清
貴室絕二八之媵坐無九九之客懸榻稀下應門鮮
通然而五祠並建躬辟主之蒸嘗千里裹糧手故人
之訖訊親仁汎愛道不相謀酬恩徇知誼有攸當至
於齊相脫駮未收越石之感孝標著論不免到漑之

嫌情意所安毀譽爲汰公旣杜口朝事遠跡世途取
亢寂寞之鄉長王嵯嶢之色偶周行墓所顧眄松栢
泐然久之謂諸子曰昔與陸生周旋館閣各言爾志
陸生慷慨裹革吾欲雍容經濟今皆已矣九原有知
寧無小憾君子以是知公之未盡忘世也公素強無
疾歲昭陽之作噩辜涂之月覺筋骨少異意殊忽忽
叔子方侍容臺典屬國促令請告奔波以歸見之喜
動顏色沈痾少平迄於改鑣竟不時損飾巾待期綽
乎太丘之度易簣就正儼矣子輿之啓大怖將臨熙
怡若寐小斂旣畢容色欣然公以弘治丁巳季夏之

六日生卒以萬曆之甲戌仲夏二十七日春秋七十
有八所著有碧山堂知退軒翰苑畱院東行紀與巖
居諸稿及纂華氏家乘九卷續傳芳集六卷東壁蘭
臺之撰春客雅麗爲宗一壑三徑之辭簡遠玄澹爲
主雖黼芾人倫膾炙羣吻俱擅珪璋靡慙竹素而巖
居一集迴乎超矣公天與檢鏡夙成規殼右文之景
雖未竟其虹攄于陸之儀僅微微於鴻漸使際虞代
則巢臯分德其在孔門亦憲賜裁衷矣寢疾之際二
子七孫長者垂紳服衿以待湯藥少者累棊採蠟以
娛游日謝庭蘭玉之榮吾宗琳琅之秀人埋靡虧夫

子可瞑甫及授窆叔子繼之乃知水竭鵬海珊瑚隨
而告枯鳳歸焉鳥鵲雛以之從逝修短迴絕衰榮不
恒其門人王世貞等感匠石之見採悲融帳之莫從
恩澤未零音徽就杳進不能請字袞於公朝退不獲
寓心喪於私壠敢造菲頌寄之堅珉其爵里父母子
姓詳具於左銘曰矯矯先生履坦安貞進不離體退
不近名讐史東觀授書西清譏以譽伏榮將瘁并三
事步武一書投削蓬心廟廊華邸丘壑天與真貴人
豈縻爵畢力溫清戢躬湯藥以儉成饒以饒成德用
必取羸施必歸澤內衆千指顛焉若畫環公之鄉爰

謗爰式里有仁父家有嚴君是亦爲政奚其離羣我
徵在昔身隱焉文君子修之必達必聞材足奢取事
誠盈忌不朽讓一達尊居二隱几委形超然曷累追
契千古聲施來祀

羅修撰倫墓誌

賀 欽

國朝鉅儒羅先生諱倫字應魁改字彝正號一峯其
先豫章人唐末徙居吉安永豐湖西代有聞人歷宋
尤盛武崗教授開禮公勤王死節以故族屬三百餘
竈無一人臣事胡元者祖諱求仁號善耕儒雅倜儻
樂善好施考諱修大號大山耿介忠信母李氏以宣
德辛亥正月十一日生先生生時有奇祥甫五歲嘗
隨李入園收果長幼競取獨賜而後受年七歲善耕
先生訓於庭不匝月而童蒙諸書咸遍明年學於里
師時乏書里師令遍逐諸生授讀諸生未成句讀而

先生皆已成誦嘗牧樵則攜書讀之自幼勤學定省之餘未嘗釋卷年十四授徒於鄉以資親養莊重嚴毅師道卓然常日學豈科第而已哉乃欲捐舉子業父兄不可已而補郡庠弟子員言動不苟勵志聖賢之學嘗曰舉業非能壞人人自壞之耳朋黨以道學目之郡守張公瑄嘉其學行而惜其貧乏命有司賙之先生謝弗受豪右肆侮殊甚先生恬然不之較也是年下內艱居制嚴甚踰大祥口始沾醜酸物嘗曰吾無以報吾母誓爲一孝子庶無愧吾母兒丙子領鄉薦癸未赴春闈遭回祿呼曰吾平生無毫髮得罪

於天今乃至此柰吾親何須臾垣上一老人以杖而出時殞軀者幾二千人而先生獲免出而招老人竟無所得未幾大山先生訃聞奔喪執禮如初先生雖不以科第爲心而大山先生預知必魁天下成化丙戌其言果驗就題論事頃刻萬言指切時弊拳拳以格君務學爲說時謂之真狀元爲翰林修撰無何會內閣大學士李公賢遭喪去官朝廷起復之臺諫皆不敢論列先生詣其私第告以不可者三復俟數日上疏歷陳古今起復之非是且謂如其不然必準富弼故事終喪劉珙故事言事反覆數千言一木於

天理人心之不容已者名曰扶植綱常事先生以犯顏敢諫爲大救時行道爲急負荷之重未嘗一日忘天下故發憤如是疏奏落職提舉泉州市舶司然士論益榮之而緘默之風爲之一變終先生之世臺省不復有起復者矣在泉時秋毫無所與惟講學鬻文以自給配梁氏安人卒泉守李宗學遺以棺乃斂明年召復修撰當道者語人曰某之復官我之力也乃無片言謝先生聞之曰渠非有私於我也乃改南京供職三川以疾辭朝廷不允二年章三上始得歸戊子秋抵家臥病苦禮記註說之繁命門人錄其要以

便觀曰庶人不失所執守也壬辰疾稍愈以族屬未化諭之以約束本之以律令鄉人化之喪禮行浮屠除盜賊息民業安十餘年間兼并不作鄉俗爲之一美嘗欲倣古置義田有助以堂食錢者先生弗受且告之曰是錢雖公亦不可費以之積粟賑民可也或衣之衣行遇乞人歿於途輒解以覆之乙未乃於金牛山中結茅東曰靜觀西曰正密居焉四方學者往來益衆於講明性學者納之務舉業者辭焉越二年戊戌九月二十四日先生疾革示門人曰人之爲學易簣之際可驗怡然而逝無所顧慮先生素清儉自

朝服外絲帛之衣未嘗入體歿無斂襲具乃取敝幃以斂門人方琬輩解衣以襲友人羅峻極貴係助以棺嗣子迎柩歸隨而悼祭者數千餘人四方赴弔者三載不絕先是夏秋間山嶽崩裂大雨如注途虎噬人烈風折木先生所居山脉忽墜一井其深叵測哲人之喪而天地山川爲之一變云先生天資剛明清介淡然無欲勵志聖賢涵養純正學貫博約才周經濟忠孝懇懇至老不衰出處進退合乎道義片言隻字有關世教故人本之以誠敬成之以寧靜又以小學近思開發之惓惓不少怠於功名富貴真如浮雲

過日惟終日乾乾不自滿足深修之功垂成不已而踐履益純此靜觀正密之銘所以繼作也先生符已甚嚴而待人甚恕自奉甚薄而調人甚急其排斥異端以崇正學蓋天性也有識之士以先生之處而委以吾道之緒冀先生之出而望以吾道之行惜乎年不配德未老而歿悲夫梁氏安人卒繼劉氏安人子男四人梁柱榦榘梁柱先後領鄉薦女三人一適張某其二早世以成化辛丑十二月某日葬本里都溪垵上源有一峯集行於世愚忝先生榜進士尊事唯謹先生直弟我不世俗讓道義相契真異姓伯仲也

愚與先生俱以戊子謁病歸餘十年而先生訃至又二十五年弘治壬戌之夏其子梁柱自京師走書古
宜請銘先生之墓嗚呼我尚何辭哉但以筆力綿弱
不足發揚盛德是愧銘曰先生之德正大光明先生
之才奇偉汪洋先生之志聖域是藏先生之功扶植
綱常嗚呼哲人日月其光醇哉醇哉百世之望

遺事

先生既上疏冢宰王忠肅公遣其部主事倪輔言於
李公勸以文潞公自待李公遜謝而已

楊東里作相時以百官祿薄請令得受皂隸錢自是
遂以爲例獨先生不受

先生名重天下所至必相率而觀之雖武臣俗吏皆
知敬仰召還時有奏事者辭連先生法當下鎮撫司
獄鎮撫曰羅先生其可至此乎即日鞫成讞之先生
遂得免

高州守饒秉鑑見先生衣單饋蟹袍先生服之入金
牛遇一丐歿於道傍卽解袍以斂而買棺以葬之
保寧守李直作懷賢堂祀三陳請先生記先生却之
曰堯叟堯咨無可祀祀文惠而及其父母可也
先生欲買義田以贍族人進賢令呂升知其力不足

也。以堂食錢助之，先生不受。日食以堂名，非公可得而私也。

廣東按察使陶公以白金五十兩請大忠祠記，先生許之。即日盡散諸族人。

一日客來甚早，先生固留之飯，不知其家無米也。夫人乞諸隣，得濕粟數升，旋炒旋脫之，則日已將中矣。先生亦曠然不以爲意也。

翰林院檢討掌南院事王公稽墓誌銘

蕭 鎡

君姓王氏，諱稽，字希稷，泰和城西里人。其先金陵人也。晉太傅導之後，南唐時有曰崇文，爲吉州刺史，因家泰和。自是舉進士者累累，曾祖子與，號竹亭，洪武初，召說書，稱旨，授福建鹽運副。以老辭，曾叔祖子啟，仕監察御史，歷崇慶知州，歸老於家。二先生俱以博學宏才，望重鄉郡。陶然詩酒，自怡有二妙集行於世。祖伯貞，繇廣東按察僉事，歷瓊州知府，改肇慶，有惠政於瓊。尊府則吏部尚書公也。母陳氏，尚書公

以上三世考皆 贈如尚書公之秩妣皆 贈一品
夫人母封如之尚書公七子君於次爲長自幼開爽
明秀而端重禮度六七歲在小學讀書數過輒成誦
命屬對應聲而就稍長從明師授詩經經傳子史百
氏凡經指畫卽了其大義先生長者皆異之時瓊州
以內艱家居尤愛之甚教之醫君兼通焉旣而曰學
不可遂已也乃與梁氏昆弟素同志者曰叔車叔莊
攻苦記覽爲文章日有程度如是者數歲學成鄉之
大家爭禮致爲塾賓訓誨有方生徒推重久之尚書
公繇翰林進春坊君往省視聞見益廣造詣益深隱
然名動縉紳間是時梁氏昆弟皆先後入仕君以邑
侯吳埜薦授泰和訓導毅然以師道自居日率諸生
坐齋中據案講說雖寒暑不懈諸生樂君教翕然相
與化服之數歲所居之齋忽產芝一本三秀諸生以
爲瑞是秋鄉選其齋中者十人秩滿陞南京國子博
士時祭酒陳公敬宗以嚴御下僚屬少違其規範輒
面斥之君滿三載無纖毫過陳公深加禮重又三載
上天官念母夫人上章乞歸省許之終考北上吏部
請陞如例 命未下祭酒吳節以缺監丞請遂命君
陞翰林檢討署監丞事監丞以繩愆爲職君雖主嚴

毅而以寬厚行之曰盡吾心而已生徒欲便出入或預致白金爲禮君戒門以絕自是人無敢于以私吳公聞之歎曰古君子也二年考績將還會南京翰林邢學士卒衆擬舉君未果吏部言之上遂命君仍

舊職掌院事天順改元尚書公歸老過南京君迎入官舍不許畱石城門旦暮定省戴星往復者凡再旬間謂人曰我雖官七品心恒自足若得乞身歸奉二親吾願足矣又三載當考績適母夫人卒於家尚書公書至啟封太慟遂倉卒北上以訃聞特蒙優卹遣進士鄭鶴營葬祭君同載南還過淮有感哭過哀加之

暑毒因病至揚州竟不起享年六十有二疾盡於教授彭倬視之謂曰吾死無憾第未送父母不瞑目且啟其篋惟白金六兩舊衣一二襲遂買棺以斂君之少也人謂瓊州典郡尚書公在朝當以門地自負於此時君方躬韋布之行汲汲以問學不足爲事及入官始終不少變或謂尚書公清文偉節見知四朝專職銓柄而君歷儒官三十年未嘗一進顯秩在公議有未厭者不知此君之所以爲賢也正統初御史掌道者得薦舉於是王裕薦君堪任風憲比南京翰林缺內閣諸老薦君任院長公皆力沮之而君亦

屢言風憲吾所不任其他顯秩蓋有命焉然則尚書
公謙慎以及其子固人所不逮而非君惡能成公之
志哉

南京翰林院孔目學古劉公敷行狀

楊廉

公諱敷字于學別號學古姓劉氏世爲吉之安成人
宋初有曰紹賢居邑東之竹江八世祖懷古值宋衰
隱居教授與須溪劉會孟爲文字交高祖復初曾祖
尚賢祖伯武 國初赴賢良徵沒於王事以子貴累
贈至奉政大夫順天府治中父諱實宣德庚戌進士
改翰林庶吉士仕至南雄府知府居官三十年凜然
冰蘖之操事載廉吏傳暨 國朝名臣言行錄公生
而重厚穎異飽聞庭訓弱冠學大進所與遊處皆一

時英傑執經授業歲常滿門領景泰庚午鄉薦再屈
於禮部及中乙榜司訓武昌至則嚴立教條終日衣
冠坐齋署改課說書無間寒暑諸生貧者量力周之
欲娶無力者率衆助爲之禮居五載丁南雄憂服除
調武進其爲教不異其在武昌也歲戊子考試順天
解首寔出藻鑑程文多其手筆極爲同事所推讓滿
九載提學御史陳公選署其考有有學有行之語奏
最陞南京翰林院孔目歲出納俸糧無慮數千或勸
之以利羨餘者公遜謝之冢宰崔公恭常造之見其
服御如寒士嘆曰父子清白世所難也每過司徒陳
公侯必延入久坐務然香盡一炷曰得領清誨爲益
多矣未幾懇乞休致時年五十有七及歸以養母教
子爲事尋以子推恩封文林郎監察御史有司舉
鄉飲輒禮爲大賓年踰八十耳目聰明步履如少壯
考終之先一月遍詣先塋拜辭時尚無恙至病中口
占一詩蓋言平生苦節至老歿不改也越二日坐而
觀化實弘治癸亥十二月之二十三日距其生時永
樂丙申三月初七日享年八十有八公性孝友遇高
曾而下忌日必哀慕終日期功之喪必旬日蔬食先
世所有悉舉以讓之弟姪嘗置祭田於祠堂屢加修

每讀史至忠孝節義輒掩卷嘆息至爲之流涕
彭文思公並早有文名甲戌春試人傳會元出安成
時邑博士吳某謂人曰果爾必劉某彭某旣而屬文
思而公竟下第一日彭文憲公座有譚祿命者文憲
曰以劉先生而不中進士信有命哉及請老司空劉
公宣以文贈之謂古人激貪起懦公其近之都御史
武進王公沂武昌徐公鏞皆門下士徐公語及公必
泣下王公揚歷仕途以清介著其爲師弟子兩無愧
焉公詩文字畫必法古晚年日取四書讀之嘗謂聖
賢之言句句切於實用所著有尚書句解墨莊彙星
曆陰陽卜筮皆能効通頗嗜風水墳墓居宅多所自
相子二壬丙同舉於鄉壬沐陽知縣丙連舉進士有
名改翰林院庶吉士由御史陞副使提學閩中

南京翰林院孔目蔡先生羽墓誌

文徵明

嘉靖二十年辛丑正月三日吳郡蔡先生卒吾吳文章之盛自昔爲東南稱首成化弘治間吳文定王文恪繼起高科傳掌 帝制遂持海內文柄同時若楊禮部君謙都太僕元敬祝京兆希哲仕不大顯而文章奕奕顛然在人要亦不可以一時一郡記先生雖稍後出而所造實深自視甚高常所評騭雖唐宋名家猶有所擇其隱然自負之意殆不肯碌碌後人而潦倒場屋曾不得盱衡抗首一儕諸公間而以小官

困頓死嗚呼豈不有命哉先生諱羽字九達其先家
陳留宋南渡時秘書郎源自大梁徙杭又自杭徙吳
居太湖之包山先生其十四世孫也高祖敬曾祖貞
祖昇以長子貴封奉政大夫父滂母吳氏先生高朗
疎俊聰警絕人少失父吳夫人親授之書輒能領解
年十二操筆爲文已有奇氣稍長盡發家所藏書自
諸子史而下悉讀而通之然不事記誦不習訓故而
融液通貫能自得師爲文必先秦兩漢爲法而自信
甚篤發揚蹈厲意必已出見諸論著奧雅宏肆潤而
不浮詩尤雋永早歲微尚纖縟旣而濺滌曼靡一歸

雅馴晚更沈著而時出奇麗見者謂雖長吉不過
生乃大悔恨曰吾辛苦作詩求出魏晉之上乃今爲
李賀耶吾媿死矣其高自標表不宥屈抑如此然其
所作凌歷頓迅誠亦高夔莫及當其得意時不知古
人所詣何如也先生故邃於易出其緒餘爲程文以
應有司而辭義藻發每一篇出人爭傳以爲式而先
生試輒不售屢挫益銳而卒無所成蓋自弘治壬子
至嘉靖辛卯凡十有四試閱四十年而先生則旣老
矣歲甲午以太學生赴選調天官卿雅知其名曰此
吾少日所聞蔡某今猶滯選調耶然限於資地亦不

能有所振拔特以程試第二人奏授南京翰林院孔
目居三年致仕歸卒於家

南京翰林院孔目何公良俊傳

良俊字元朗松江華亭縣人以所居自稱柘湖居士
少與弟良傳皆負俊才或以雲間二陸比之良傳舉
進士爲南禮部郎良俊偃蹇場屋不售久之貢入太
學當事者重其才名授南翰院孔目良俊故負勝情
喜南都山水奇麗日與名人韻士相追隨品題殆遍
會趙文肅公來視院篆一見相契合引與深語良俊
談當世之務疊疊然不覺膝之前於席也後王諭德
維禎至待良俊亦如之每出遊必挾與俱唱和篇章
具載集中二公旣去不樂與錄錄者處輒棄去其學

無所不窺下筆波委雲屬千言立就於金石古文書
畫詞曲精於鑒賞卜居金陵十年始歸所著有何翰
林集二十八卷何氏語林三十卷四友齋叢說三十
卷書畫銘心錄一卷

焦太史編輯國朝獻徵錄卷之二十三終

焦太史編輯國朝獻徵錄卷之二十四目錄

吏部一

尚書

陳修

詹同 子微

吳琳

張度

僕斯

翟善

杜澤

張統

蹇義

郭璉

王直

王翺

何文淵

李秉

姚夔 尹旻

李裕 耿裕

王恕 屠滂

倪岳 馬文升

許進 張綵

陸完 王瓊

目錄

焦太史編輯國朝獻徵錄卷之二十四

吏部一

尚書

嘉議大夫吏部尚書廣信陳公修墓志銘

解縉

余奉詔纂修 太祖實錄觀自歲癸卯戡定陳氏彭

蠡之戰至動星象衆庶咸見而四方高桀之士雲合

響應輻輳而爭趨之雖湯武之得士未能如是何其

盛哉至歲甲辰即王位而溯江取次平若廣信陳公

修 太祖之尤注眷者也是以首擢理官謀畫律令

定律

定正

崇寬厚而省繁苛復倫要而黜姑息簡明正大四方
翕然知有一統之制作由此始焉繼而又謂兵制之
大者唐世府兵之制稍爲近古而未精密乃擢公兵
部郎中所以任將帥養士卒得內外相維之體兵農
相資之意遂爲萬世法而公之昭顯成德益以著焉
太祖初卽位山東新下念濟南重經王氏之亂民
墜塗炭尤甚大將練兵屯田其間非公莫可治也遂
擢濟南知府居二年而政成大嘉之以天官六曹之
長明習經制建官均職惟公是宜擢拜吏部尚書引
據古典參酌時宜審地劇易制事繁簡貴賤疎數遠
近寬嚴課功覈實賞錫黜陟之類皆公啓之未幾卒
於位繼之者莫能移易也予謂 太祖之治天下也
其事有緒而若素定於畎畝之中誠所謂天授之者
而一時勲舊臣高才碩德道全方備皆非近世之所
能髣髴其一二者也於戲盛哉

吏部尚書詹公同傳

子徽

王景彰

詹承旨同字同文徽之新安人少穎悟好學元奎

學士虞集見之曰才子也舉茂才異等爲柳州路儒

學正遇亂因家黃州陳友諒以爲翰林學士承旨兼

御史歲甲辰王師下武昌同見 上上厚待之還京

授國子博士遷考功郎起居注翰林待制洪武元年

轉直學士二年遷侍讀學士四年陞吏部尚書六年

七月爲學士承旨兼吏部尚書七年五月命致仕勅

曰朕起布衣提三尺劔總率六師以拯民艱延攬羣

英以圖至治凡二紀於茲曩者親征武昌下城之日

爾同以文章之美從朕同遊厥後任以國子博士起居注翰林學士皆舉其職及長吏部辨人才之賢否審職任之輕重咸得其宜今年雖已邁猶輸誠效謀訖無少怠可謂賢也已朕不忍卿以衰耄之年服趨走之勞特命以翰林學士承旨致仕爾惟欽哉丙午年四月庚寅 上嘗命有司訪求古今書籍藏之秘府以資覽閱因謂侍臣詹同日三皇五帝之書不盡傳於世故後世鮮知其行事漢武帝購求遺書而六經始出唐虞三代之治始可得而見武帝雄才大略後世罕及至表章六經開闢聖賢之學又有功於後世吾每於宮中無事輒取孔子之言觀之如節用而愛人使民以時真治國之良規孔子之言誠萬世之師也吳元年四月壬子 上諭起居注詹同等曰國史貴乎直筆是非善惡皆當書之昔唐太宗觀史雖失大體然命直書建成之事是欲以公天下也予近日言行可紀之事是非善惡汝等皆當明白直書勿宜隱諱使後世觀之不失其實 洪武二年二月壬辰詔以直學士詹同爲侍讀學士 上與侍臣論待大臣之禮御史中丞劉基言於 上曰古者公卿有罪盤水加劔詣請室自我未嘗鄙辱之存待大臣之

禮也時侍讀學士詹同侍坐因取大戴禮及賈誼疏以進且曰古者刑不上大夫所以勵廉恥而君臣之恩義兩盡也 上深然之三月戊申 上謂翰林侍講學士詹同曰古人為文章或以明道德或以通當世之務如典謨之言皆明白易知無深怪險僻之語至如諸葛孔明出師表亦何嘗雕刻為文而誠意溢出至今使人誦之自然忠義感激近世之士不究道德之本不達當世之務立辭雖艱深而意實淺近即使過於相如揚雄何裨實用自今翰林為文但取通道理明世務者無事浮藻 洪武六年正月 上謂

儒臣詹同曰朕嘗思聲色乃伐性之斧斤易以溺人一有溺焉則禍敗隨之故其為害甚於鴆毒朕觀前代人君以此敗亡者不少蓋為君居天下之尊享四海之富靡曼之色窈窕之聲何求而不得苟不知遠之則小人乘間納其淫邪不為迷惑者幾人焉况創業垂統之君為子孫之所承式尤不可以不謹同對曰不邇聲色昔成湯所以能垂裕後昆 陛下此言乃端本澄源之道誠萬世子孫之法也 洪武六年四月丙辰以詹同為翰林學士承旨仍兼吏部尚書九月壬寅翰林學士承旨兼吏部尚書詹同等言自

編日

上起兵渡江以來征討平定之蹟禮樂治道之詳雖有紀載而木成書乞編日曆藏之金匱傳於後世上從其請命同與侍講學士宋濂為總裁官侍講學士樂韶鳳為催纂官禮部員外郎吳伯宗儒士朱右趙堦徐一夔孫作徐尊生同纂修鄉貢士黃和國子生陳益暘等謄寫洪武七年五月丙寅朔修大明日曆成自上起兵臨濠至卽位六年癸丑冬十二月凡征伐次第禮樂沿革刑政設施羣臣功過四夷朝貢之類莫不具載合一百卷承旨詹同侍講學士宋濂率諸儒上進命藏之金匱其副藏於秘書監

濂等又言於上日曆藏之天府人欲見之有不得臣請如唐太宗貞觀政要分類更輯聖政為書以

傳於天下後世上從之於是分爲四十類自敬天至制蠻夷釐爲五卷總四萬五千五百餘言名曰皇明寶訓自是以後凡有聖政史官日記錄之隨類增入戊午上謂翰林學士承旨詹同日大祀旣終獻方行分獻禮於禮未當卿等其議之於是同與學士宋濂議以上行初獻禮奠玉帛將畢卽分獻官行初獻禮亞獻終獻皆如之上從其議又謂古人祭用香燭皆所以導達陰陽以接神明初無上香之禮

遂命凡祭祀罷上香 洪武十六年十二月賜僉都御史詹徽等襲衣 洪武十七年正月以左僉都御史詹徽爲左都御史 洪武十九年七月 上以左都御史詹徽在職公勤詔有司復其家 洪武二十三年十月以太子洗馬詹紱爲尚寶司丞紱左都御史兼吏部尚書徽之子也 洪武二十五年十二月以詹徽爲太子少保兼吏部尚書

南廡志

黃佐

詹同名書字同文後以字行徽州婺源人四世祖青始以武弁起家扈從宋高宗南渡官至武德大夫殿

前統制其後脫尺籍與編氓伍曰安知吾子孫不有以文學興者乎至鼎生同文年十二三從鄉先生學有俊聲時元學士虞集弟槃爲蒼梧尹見而奇之妻之以子授易於甘楚材學春秋於劉彭壽二人皆當世名儒以經術名世而同文天資俊爽見趣卓絕能盡造其闡奧至正中舉茂才異等爲郴州學正遇亂寓寅州仕陳氏因占籍武昌甲辰王師下武昌遂來歸 上厚待之暇則與之講論經史同文占對不窮上益加禮重及還京師除博士屬中書省已而集功臣胄子於 內府命同文教之更其官爲國子博士

其僚友治一經者猶不能盡通同文乃能淹貫羣籍
隨叩而鳴每講易與春秋尤獨超詣聽者豁然賦性
爽敏涵揉濬發爲文操筆立就水湧山立可喜可愕
時與上同遊每應制有作上未嘗不稱善也歷
遷考功郎中起居注翰林待制洪武元年轉直學士
始賜名同更以同文爲字嘗訂正音樂進所訂釋
奠樂章下太常用之二年遷侍讀學士四年陞吏部
尚書六年爲學士承旨仍兼吏部尚書甄別人倫鋪
張神藻爲朝野所推服後致仕卒同操行耿介始終
清白所著有海天集天衢吟嘯集其子徽仕至左都
御史兼吏部尚書父子世爲冢宰亦薦紳盛事也

尚書吳公琳

黃佐

吳琳黃州黃岡人世爲詩禮名家父應澍勤儉好施
教於其鄉號西山先生琳性資純篤力於問學通毛
詩小戴記王師平陳友諒上方徵用荆楚名儒詹
同薦琳通經學古且能文章遂召爲國子助教與同
並教胄子才藻瓌麗琳固讓同至於商確經義疊疊
不倦則琳所長也每遇上聽政之暇有所咨詢輒
進嘉言天下陰受其賜後遷浙江按察司僉事克振
風紀及貳鹺臺國課以辦已而入爲起居注獻納益
勤進兵部尚書方試京闈髦士有司以主文請上

思琳優於經學遂命琳與司業宋濂柄其事及撤棘
衆謂得人洪武六年改吏部尚書錫之誥命有學術
旣醇踐履尤正之褒與詹同迭視部事琳尋以老致
仕旣家居 朝廷嘗遣使察之使者潛至其旁舍見
一農人孤坐小兒起而拔稻秧徐布於田貌甚端謹
使者乃問曰此有吳尚書者在家否乎農人斂手對
曰琳是也使者還以其狀聞上益重之

吏部尚書張公度傳

黃佐

張度字景儀增城人風儀偉特未冠時有相者見之
曰山角淵庭柱石材也 以才學聞元季舉茂才爲高
要縣學教諭遭亂棄官歸杜門讀書而業益進洪武
壬子舉於鄉計偕如京師會罷科舉 詔選賢能補
憲職遂擢監察御史度以譽望振一時彈劾務持大
體 高皇帝重之時諸勛臣連姻帝室多怙勢者度
每事檢舉風采凜然朝著爲之屏迹嘗建議立張巡
廟於歸德州以勸忠 上亟命有司舉行魏觀知蘇
州治張士誠故宫爲府署有司以爲言 高皇帝使

度偵之度往變姓名爲日者入吳縣學宮廉其實還
奏稱 旨或言度在吳縣學宮每師生會膳度就食
惟分其餘以故人益不疑而事情益覈 上聞而深
器之尋誅畿輔諸郡守擢度知常州府治政公勤人
不敢干以私雖公務倥偬不廢文業勸勉郡人俾知
向學禮教諄然大興前郡守何用修公廨建庠序祠
宇未畢以罪去度力終其事而民不以爲病治行爲
畿輔第一遂召爲吏部侍郎嘗條舉選法之不當者
數十餘事 上之皆見用居法從六年進本部尚書
藻鑑人品銓選得體持廉秉公朝野欽之後以小誤
當獲微譴閉戶一昔憤惋卒人皆傷之度爲入清謹
有用世才鄉人尊之以爲有崔清獻風流云

吏部尚書僕斯傳

僕斯字 應天府溧陽縣人故元嘉定州知州來
附王師洪武元年授兵部員外郎本年擢尚寶符寶
郎三年高麗遣使上表來貢方物遣斯齎印封之改
尚寶司丞仍以祝文牲幣祭其境內山川使回稱旨
日侍左右四年出知太安州六年陞河間府知府俱
以才幹著而民亦不擾九年入爲戶部郎中尋陞戶
部尚書本年調山西左叅政十三年正月召拜吏部
尚書二月改禮部尚書本年以年老致仕

吏部尚書翟公善傳

雷禮

翟善字敬夫直隸揚州府泰興縣人洪武中由茂員入國子監授吏部主事歷本部員外郎二十六年入部尚書詹徽侍郎傅友文伏誅命善署部事善於其職稱上旨特陞吏部侍郎仍掌尚書事會上以諸司職有崇卑政有大小無方冊以著成法恐後之蒞官者罔知職任政事施設之詳乃命善同翰林儒臣倣唐六典之制自五府六部都察院以下諸司凡有設官分職之類務編爲書名曰諸司職掌詔刻行頒布中外五月奏准各衙門吏三年役滿於本衙

門見缺令史書吏內陞用再役三年給由赴京如有
餘吏送赴吏部不許一槩縣陞於州州陞於府府陞
布政司等衙門及王府長史司託故不給由者治罪
其各處布按承差奏准以能幹人員選取三年考滿
役日無私過於雜職內序用有私過者則充吏十月
詔祭酒胡季安選監生年三十以上能文章者三百
四十一人命善除授教諭等官二十八年實授吏部
尚書一日 上諭羣臣曰善雖年少宇量宏闊他莫
能侔也善明於經濟凡所奏議允合 上心上曰朕
有良佐何患天下不治 上欲命工部爲善營第於
泰輿善曰江鄉地隘宗親且衆誠不忍奪人以自益
也况未報涓埃何敢當此 上語羣臣曰有官居鼎
鼈無地起樓臺善與寇準同風矣善家戍籍 上欲
免之善曰戍卒宜增豈可以臣破例 上曰善可謂
社稷臣矣二十九年正月以事免

吏部尚書杜公澤傳

禮

杜澤山東青州府沂水縣人洪武中以文學授沂水縣學訓導二十年侍臣薦其經明行修召陞司經局試校書二十五年改詹事院爲府設詹事少詹府丞等官輔導東宮侍從講讀每進講畢時凡帝發落過五府軍政六部緊要事務及撫字四夷恩意大經大法皆得與聞進澤詹事府丞澤朴實持重言動不踰禮上嘉之於二十九年正月特陞吏部尚書首定朝覲之制以辰戌丑未年爲期朝正後吏部會同都察院考入覲官員奏請定奪其存留者俱引至御

前刑部及科道各露章糾劾怠職之罪一時譴責宥免皆出 上命及宥免還任各賜勅一道以申飭戒其已往一歲一朝之制俱革三月賜高麗布一疋會學正吳啓言國子師生例以文學優劣分隸六堂邇來皆無甄別高下不分無以激勸宜考第如例 上令魏國公徐輝祖及禮部翰林院官同詣監考試仍令澤以次錄用毋使淹滯三十年正月奏定考覈等第先是洪武初在京官三年一調用二十九年始以九年爲滿至是定官員等第勤慎者仍治其事實授在仕三月才力不逮者奏請降黜其各王府官與護

衛首領官例不考覈三月 上令澤再試寄監下第

舉人中式者次其等第授教諭訓導其不中者則除州吏目三十一年正月定考覈府縣首領官法先是各府州縣首領在任三年及九年考滿考不稱職者發充吏役至此乃令首領官不分在任淺深但不稱職俱發充吏三月續定吏員出身皆以九年考滿出身或在京兩考在外一考或在京一考在外兩考一品二品衙門提控都吏從七品出身掾史令史典史并內府衙門吏正八品出身三品衙門令史從八品出身典吏正九品四品衙門司吏正九品出身四品

衙門典吏五品衙門司吏典吏書吏俱從九品出身
六品至九品雜職衙門文典都察院吏典俱除雜職
其撥歷亦從衙門大小而均分之其吏員考滿不給
出丁憂不起復其侍親等項託故在閒已經官府問
斷仍充吏役者重歷三年澤掌銓慎守不欺本年四
月以年老致仕

吏部尚書張公統傳

鄭 曉

張公統字昭季富平人父月川文行知名統洪武中
舉通經爲東宮侍書才識通敏太子器重公洪武十
二年冬陞通政司左叅議試左通政十五年雲南平
出爲右叅政陞辭 上賦詩二章賜公歷進左布政
使凡土地貢賦法令條格祠祀公廨上下典儀經費
程度悉公裁定夷民孚說遠邇奠安是時雲南寓賢
董倫王景韓宜可輩不問識不識皆厚恤之以故遷
謫至者如歸二十六年三月秩滿入覲治行爲天下
第一特令吏部勿考賜璽書曰曩者討平西南夷命

官撫守爾公實先往任今五年言出則諸夷聽服令
布則四野懽忻皆由誠信相孚克共乃職今年來朝
不待考而朕知其功出乎天下十二牧之首故嘉汝
績復命仍治黔南汝往欽哉賜宴及道里費三十一
年召爲吏部尚書滇人如失父母時建文旁求遺逸
日集闕下率命公試鑑識精絕各當其材會修 太
祖實錄被旨試翰林編修官考第高下公得楊士奇
策喜曰明達時務有用之才不但文辭之工也奏第
一授王府審理副靖難後召公及戶部尚書王鈿論
曰卿二人久事 皇考習知典故今皆老矣其解職
務月給尚書半俸居京師視時政有戾舊制者直告
朕無隱庶稱厚望老成之意公出遂自經吏部後堂
死

故少師吏部尚書贈特進光祿大夫太師謚忠

定蹇公義墓志銘

楊士奇

宣德十年正月十有五日少師吏部尚書蹇公薨於
位先四日以疾聞 上遣太監范弘以醫來視賜鈔
萬緡明日范太監以眾醫偕來又明日疾革范復來
問所欲言對曰 陛下初嗣大寶義獨寡祐不能效
分寸裨益然區區犬馬之誠所望於 聖明者惟敬
守洪武成憲始終不渝耳言已而絕計聞 上深悼

歎屬時國有大事悉停諸祀特賜鈔萬緡勅工部治
喪葬贈公特進光祿大夫太師謚忠定遣某官某賜

祭而官其長子英等奉襯歸葬有日求余爲銘余
公同朝三十有五年而事 仁宗皇帝自登儲至大
位始終皆陪公公國家老成人所以啓益士奇蓋多
不敢辭蹇氏世家重慶之巴縣宋以來多顯仕自公
高曾而下始隱居不出以公貴三代皆贈榮祿大夫
少師吏部尚書妣皆夫人公諱義字宜之生而岐嶷
長端重不好弄而嗜學弗懈始從里社師中書左丞
殷哲時爲郡守一見異之引充郡學弟子員語其師
曰是兒將來遠到非吾所及當成就之而公不煩程
督日益有進洪武甲子中四川鄉試明年中禮部會

御筆
賜
名

試廷試賜同進士出身擢中書舍人授徵事郎見重
太祖高皇帝每前奏事率稱 旨而數見獎賚初
名瑤一日奏事畢問汝蹇叔之後乎親灑宸翰書義
字賜之以易舊名時丁羅夫人憂賜道里費且命馳
驛歸蓋特恩云服闋仍舊職滿三載吏部奏當調特
命終九載朝夕左右凡機密文字必以付公而小心
敬慎久而愈篤建文中陞吏部右侍郎授嘉議大夫
太宗文皇帝入正大統轉左侍郎數月陞吏部尚
書授資善大夫時政令制度有非洪武之舊者詔悉
復之公從容爲 上言損益貴適時宜間舉數事陳

說本末 文皇帝以公忠實悉從其言小人有譖公
不忘建文者賴 上聖明不聽有除官不得善地訴
公不公者上皆斥之永樂二年冊 仁宗皇帝爲皇
太子命公爲詹事時師傅皆以勲臣兼之而輔導責
任文臣詹事蓋元僚也 上欲有諭皇太子率諭詹
事往導意公亦委曲周悉皇太子尤愛重公所言靡
不信用滿三載陞資政大夫七年 車駕巡守北京
命 皇太子監國中外庶務惟諸王及遠夷有奏請
詣行在餘悉啓聞處分公熟於典故達於政體孜孜
無倦不動聲色而事賴以濟賜誥以其官秩封贈二
代滿九載賜勅有秉心正直及淳良篤實裨益國家
之褒數奉命兼禮部事雖職務填委處之裕如十七
年丁父喪歸 上及皇太子皆遣官賜祭有詔起復
公詣北京謝 上慰勞再三賜鈔千緡遣中官護送
歸南京明年從皇太子朝北京遂命公巡撫直隸應
天等府州問兵民休戚及文武吏之賢否而升黜之
公謂 國家多事之際悉以法繩吏人將不勝特黜
其太甚者數人餘多見寬假而兵民利弊當建革者
具奏行之 仁宗皇帝初嗣位一切政議預者三四
人而公居首進少保兼吏部尚書二俸俱支賜冠服

象笏及玉帶二遂進少傅又進少師賜師傅之臣銀
章各一其文曰繩愆糾繆公首被賜 上諭之曰朕
有過舉卿卽具疏用此封識進來蓋望公等匡直也
繼賜誥授榮祿大夫封贈三代及妻於公數人誥詞
上特增曰勿謂崇高而難入勿以有所從違而或
怠所以望公等者甚切也又念公侍從監國舊勞特
製蹇忠貞印賜之而賜勅有以善翊君勞心焦思二
十餘年夷險一節之褒時修 太宗皇帝實錄命公
監修 宣宗皇帝嗣位一切政議屬公數人如 仁
考之初繼奉命監修 仁宗皇帝實錄書成賜白金

文綺鞍馬扈從征庶人高煦還寵賚尤厚復從征邊
旣還以公年老不欲煩以有司之務賜勅曰卿事
祖宗積效勤誠朕嗣統以來尤資贊輔夙夜在念圖
善始終蓋以卿春秋高尚典劇司優老待賢禮非攸
當况師保之重寅亮爲職不煩庶政乃副倚毘可輟
吏部之務朝夕在朕左右相與討論至理共寧邦家
其專精神審思慮益致嘉猷用稱春倚老成之意賜
銀章一其文曰忠厚寬弘益以裒德去賜新第於文
明門內寵錫游加吏部言公歷少師九載降勅褒諭
仍賜宴禮部是歲生日賜鈔萬緡廐馬一匹 今上

嗣大位之日賜白金文綺是夕齋宿於公得疾越五日竟不起享年七十有三公爲人沈深質實和厚簡靜內有孝友之行事君有誠處人有量無所拂逆未嘗輕涉一語傷物至於議法亦不苟爲包含必歸忠正歷事五朝凡五十年所履坦坦無一日顛隕之憂退朝之暇手不釋卷貴而能謙富而能約 上前所言未嘗退以語人蓋天下有陰被其利者矣士奇嘗竊論之魯簡肅之忠實不欺李文正之不爲傷人害物張忠定之不飾玩好傅獻簡之遇人以誠范忠文之不設城府公蓋兼而有之矣

吏部尚書郭璉

璉直隸新安縣人永樂初任戶部主事能勤職務爲卿佐倚任 太宗亦知其名未幾陞福建右叅議時年二十四咸呼小方面歷陞工部右侍郎時修武當山宮觀命璉董其工事竣轉吏部左侍郎尚書蹇義輟部事 宣宗欲璉爲尚書大學士楊士奇以爲吏尚書非才學俱優者不足以當之乃不果用未幾璉九年秩滿卒陞尚書典選有方正統中言官劾其有私遂令致仕至是卒年七十七計聞遣官諭祭有司營葬璉雖少廉名然爲人朴實有量行事安靜未嘗

有急遽色時稱其忠厚長者云

宣德五年晉尚書 上諭曰朕以用人之柄付卿卿宜爲朕擇才昨郡守多缺命廷臣薦舉古人當斯任者必勤於咨訪有得卽錄故官不乏才呂蒙正夾袋虞允文材館錄是也慎留意正統元年進士李賢入選公試賢嘉禾詩奇賢輔相林授驗封主事未幾早蝗侍臣言大臣尸位妨賢內批令自陳諸大臣遂皆引去謝天譴公獨不可曰主上冲年吾輩皆先朝簡任受付托一時請去誰與爲理宜引罪乞改過璉老矣官至冢宰豈敢貪位顧君臣恩義如此衆是公言

疏上盡留諸大臣

李氏藏書

賢詩反
相才

吏部尚書致仕贈太保謚文端王公直神道碑

銘

李賢

公諱直字行儉別號抑菴系出瑯琊晉太傅導之後也導輔東晉遂家金陵後數世有崇文者仕唐爲吉州刺史因家吉州又數世孫贄仕宋爲戶部侍郎徙居泰和代有顯人曾祖以道祖子興隱居不仕父伯貞仕國朝爲肇慶知府俱以公貴累贈少傅兼太子太師吏部尚書妣皆贈一品夫人公早喪母而父以事去賴祖母李夫人撫育自幼端重異於常見家貧力薄刻苦讀書永樂改元遂領鄉薦明年登進士第

時 太宗皇帝篤意古學詔選進士曾榮等二十八人爲翰林庶吉士俾讀中秘書冀成遠大之器公在選中感激奮志不數年文辭追古作者 上以公卓越諸士召入內閣凡機密之政屬執筆焉尋授翰林修撰 車駕巡幸北京 仁宗爲皇太子監國留務之重選任尤嚴時翰林則留黃淮楊士奇與公三人輔導公夙夜勤慎不懈中外咸倚重之及再幸北京公在扈從遂與修 太祖實錄未成以憂去服闋仍入翰林陞侍讀 仁宗卽位進侍讀學士 宣宗爲皇太子慎選官僚首陞公右春坊右庶子仍兼侍讀學士凡經筵講義及文武羣臣誥勅皆以屬公又兼記注至於 聖政聖訓之當書者皆錄之以備纂述進階奉議大夫 宣宗卽位與修兩朝實錄成進詹事府少詹事仍兼侍讀學士有白金綵幣襲衣寶鏹之賚進階中順大夫 今上嗣位詔修先朝實錄以公總裁書成進禮部左侍郎仍兼學士賞賚如前久之以禮部缺人命公出蒞部事宗伯胡公大喜闔部之政悉付之公處之裕然若素習者吏部尚書郭璉去位詔以公代之 命下士類皆悅進階資善大夫歷再歲有無賴不得志者以選撥事嫁禍於公給舍

御史交章論列乃直公誣加授資德大夫正治上卿
正統己巳秋北虜犯邊車駕欲親征公獨以爲不
可率廷臣上疏止之不獲特命公留守京師加太子
太保兼吏部尚書尋進階榮祿大夫景泰初進少傅
于申兼太子太師進階光祿大夫累疏求退不允天
順改元皇上復位圖任舊人公艱於步履不能朝
謁懇乞休致并辭師傅二職詔特許之賜以璽書有
忠清之操簡於朕懷之語復出白金文綺寶鏹賜之
給驛舟以歸公方面修髯器宇宏偉望之若神仙中
人天性嚴重寡言入居家儼然及至接人和氣可掬

學富才敏詩文清緻四方求者接踵屢典春闈文衡
得人最盛在翰林三十餘年恭勤不息如一日與王
文安公齊名時稱二王又以居第在東稱東王先生
士類莫不拭目海內想聞其風采及位冢宰益加廉
慎時方面官罷廷臣薦舉專屬吏部公益留意人才
委任部屬凡御史出巡歸者必令報其高下以備拔
用自是四方多號得人奔競之風爲之一息居第隘
陋曾不屑意一切世味安於淡薄朝廷重公之德每
優禮之免其朝謁及退休居家杜門不出日課諸孫
讀書而已所著有抑菴集若干卷行於世天順六年

九月二十三日以疾終於正寢享年八十有四計聞上爲之悼愴特贈太保謚文端遣官諭祭於其家復令有司營葬事

王文端公傳

王文端公直字行儉泰和人以庶吉士入內閣書機密文字歷修撰侍讀學士正統初陞禮部侍郎仍兼學士尋拜吏部尚書己巳 駕親征北虜公率廷臣疏諫止不聽 命留守京師景泰初屢乞遣使奉迎 駕還不允明年禮部議奏復迎 上御文華殿門諭宜絕虜公言乞遣使勿貽後悔 上色不悅諭諸

大臣曰朕初無意大位君曾過謂朕宜今奈何異議丁少保言天位已定孰敢他議但欲答使盡禮紆邊急耳 上曰從汝羣臣出文華門內臣興安出呼曰疇堪使者有文天祥富弼其人乎衆未對公面發赤厲聲曰是何言臣皆王臣唯在所使敢弗行乎言至再詞色愈厲安語塞遂遣李實羅綺使虜尋進少傅兼太子太師天順改元致仕公器宇宏偉位冢宰一十六年留意時彥凡御史復命必令報所屬高下以備擢用科臣葉盛林聰以直言忤當事者公力護之一時干請奔競之風息大稱得人遇不如意事輒誦

古人詩自寬有初拜給事中卽欲干撓選法者則曰
偶然題作木居士便有無窮求福人御史有言吏部
進退官不當則曰若教鮑老當筵舞更覺郎當舞袖
長雖涉諧戲要切中云公於世味一切淡泊官極人
臣無以遺子孫居第隘陋年踰八十嘗從諸佃僕耕
時擊鼓唱歌諸子孫更迭稱觴上壽爲樂嘗言西揚
不欲我同事內閣出理部事當時意不能無憾若使
不出部丁丑正月當坐首禍必有遼陽之行安得與
汝曹爲樂以此知出處自有定分非人力所能爲也
公嘗以詩寄錢塘戴文進索畫且自序管與文進交

時嘗戲作一聯至是十年而始成之臨川聶大年題
其後曰公愛文進之畫十年而不忘也使公以十年
不忘之心待天下之賢則天下豈復有遺才哉語亦
稍聞於公公置之不省後大年舉爲史官困於譏讒
臥病逆旅自度不可起乃使所親投詩於公公得詩
泣下曰大年欲吾銘其墓耳明日而大年卒公爲墓
誌有曰吾以大年之才必能自振故久不擬薦而乃
止一校官耶大年所題之言固爲正論使隘者聞之
將必以爲譏已其孰不加擠也而公不以爲意至泣
而銘其墓真所謂休休有容者矣

吏部尚書王翱傳

永平志

王翱字九臯鹽山人永樂十三年進士先是北人舉進士者輒在後是年初會試貢士北京翱兩試皆高等上喜召見賜改翰林庶吉士授大理左寺正詿誤遷行人宣德元年西楊薦陞行在山東道御史謹重達大體十年陞僉都御史正統元年鎮守江西未幾巡浙江拊善摧奸吏民畏愛四年松番用兵不效翱出贊理六年鎮陝西七年東虜殺掠吏民師出輒北遼東西震動且撼漁陽翱提督軍務明年陞副都御史畱撫遼東十二年出塞破虜有功陞右副都御

史十四年陞左是年秋虜分寇廣寧清野困之虜退去京泰三年召還臺尋加太子太保是年建州酋李滿住上番書乞留翱遼東不許會南蠻寇兩廣兩廣副總兵董興武毅觀望不肯戰巡撫侍郎揭稽李棠不相統賊益熾于少保請用安遠侯柳溥總督兩廣軍務如溥未可出臣謙及戶部尚書企濂王翱乞用一人上用翱明年蠻平召還臺是年夏升吏部尚書初翱入四川專布恩信招懷降附出賜金市牛酒慰犒番酋商巴等十八寨來歸不煩兵力松番遂定遼東法令久弛不復知有朝廷賞罰以故虜至不

敢戰戰亦不力翱至諸將庭叅責其玩寇喪師失律當斬軍中股慄頭搶地言自今效死用命得釋翱卽出巡邊起山海抵開原繕濬墉溝五里爲堡十里爲屯烽燧斥堠千里相望虜見嚙指走翱益簡練卒伍賑賙窮乏偶配鰥寡人情大悅邊塞孤遠軍興輒置緣俗立法細大收贖十數年間得金穀馬牛羊數十萬邊用克饒器械明利士皆飽煖願得一戰報主翱逾年督諸軍出塞大破虜斬首千級比至嶺南亦用收贖法時翱威望已著諸蠻聞翱來大懼翱略兵威推誠撫諭盜寇止息會長信向翱嘗言蠻戎撫捕各

有機宜以故四川兩廣得免繹騷之患翱初入吏部
佐王文端公天順初落太子太保文端公致仕專任
翱翱嚴考察公銓註抑奔競杜請寄一時任使並稱
得人南陽爲石亨逐去裕陵召見翱問賢何如人翱
力言賢才行得復畱內閣益見倚任南陽在內閣亦
左右翱 上進退大臣時時召翱面可否稱翱先生
屢乞休不允翱以故得行其志天順五年加太子少
保 上嘗諭南陽曰今六部尚書庶皆得人但慮吏
部玉翱老爾時翱年七十八南陽對曰臣聞祿命之
說翱壽最高尚有十年 上喜曰如此無慮又曰如

口部年富不易得南陽對曰若繼翱吏部非富不可
上曰然 茂陵卽位免翱雨雪朝成化元年復太
子太保三年致仕卒年八十四贈太保謚忠肅翱善
知人文武大吏施聚焦禮范信耿九疇軒輓年富李
秉程信皆翱薦用翱本北人嘗因召對 裕陵曰北
人質直雄偉文章藻飾似不及南顧緩急得力以故
翱推轂北人爲多至姚夔又反翱往往右南人清譽
稍不及翱功名損於禮部時翱端方強毅清白儉約
立心制行循守禮法惕厲憂勤仰思待旦居第三十
餘年不改於舊 上特命有司起第縣西公餘退宿

朝房惟朔望時令歸謁先祠曹賊亦知重朝不忍加害南陽嘗曰皋陶言九德王翽有其五亂而敬擾而毅簡而廉剛而塞強而義彭惠安公質翽淡然無欲不識姜姬而况苞苴莫我敢施古三不惑於公見之人皆以爲確論子竚世官錦衣副千戶

遼東指揮孫璟者以漏關鞭戍卒至死其妻女相繼哭之死他卒被鞭者訴璟殺一家三人公判曰卒死以罪妻女死於夫父非殺也其令璟償葬埋費後璟爲名將

少傅王文端公以清德雅望居吏部年且老矣朝廷思得剛明果斷者以濟之乃自兩廣召公還命以太子太保兼吏部尚書士大夫以得人相慶

英宗復位時眷遇公加隆賞賚以金玉束帶錦繡衣服銀幣玩器等物歲無虛月屢召與近臣同遊西苑南城及扈從獵近郊燕賜優渥一時擢用廷臣惟公言聽有出他人薦者亦必待公而後決每召見便殿訪問從容呼以老王而不名其見敬禮如此

神道碑

曹欽反夜執李文達於東長安門斫傷其首血流滿面奔公所求救賊併執公公曰朝廷何負汝汝乃反也殺他人寧殺我賊素敬服公因謝曰豈敢傷長者

耶遂上馬去李得釋

每見朝廷行一善政則喜見顏色或有未善攢眉累日聞天下水旱災傷急尋所在官吏問有無儲積民不得流離餓死否其愛國愛民如此

權豪勢要有所囑殺色拒之詞色俱厲及處之不甚拂其情故人雖畏公而心不爲怨於恩仇一不介意

曰吏部豈報恩仇之地耶

行狀

王忠肅公翱爲吏部尚書忠清爲

英皇所任信仲

孫以廕入監應秋試以有司印卷白公公曰汝才儻可登第吾豈忍蔽之顧汝學尚未萬一誤中選則妨

一寒士矣且汝有階得仕何必強所不能以幸冀非分邪裂卷火之公一女嫁爲畿輔某公某妻公夫人甚愛女每迎壻固不遣恚而語女曰而翁長銓遷我京職則汝朝夕侍母且遷我如振落葉耳而故恠者何女寄言於母夫人一夕置酒跪白公公大怒取案上器擊傷夫人出駕而宿於朝房數旬乃還第壻竟不調公爲都御史與大監某鎮守遼東某人亦循理守法與公甚得也後公改督兩廣大監泣別贈大珠四枚公固辭大監泣曰是非賂得之昔先皇頒僧保所貨西洋珠於侍臣某得八焉今以半別公公固

知某不貪也公受珠納所著披襖中紉之後還朝太
 監物故矣求太監後得二從子公勞之曰若翁廉若
 輩得無苦貧乎皆曰然公曰如有營予佐爾買二子
 心計公無從辦特示故人意爾皆陽應曰諾公屢促
 之必如約乃偽為屋券列買五百金告公公拆襖出
 珠授之封識宛然

維風編

吏部尚書何公文淵行狀

章 綸

公諱文淵字巨川姓何氏江右廣昌人祖德元考景
 榮俱贈正議大夫資治尹吏部左侍郎母吳氏封太
 淑人公幼英邁年七歲讀書過目成誦羣兒或竊瓜
 果以奉公却之曰童稚之年詎可習為盜哉識者歎
 其不凡永樂初選補邑庠生時父兄繼喪公晝則經
 營家事夜則刻苦讀書歲戊戌登李騏榜進士第越
 二年拜湖廣道監察御史以廉介自持巡按山東發
 奸擿伏吏民畏之 仁宗卽位命考四川吏治公察
 其殿宿而黜陟之其風裁凜然貪暴往往棄官去時

蜀旱所臨郡邑輒雨人謂御史雨烏蒙土官知府祿
昭妻與耆民什伽私昭知之什伽懼罪潛赴京告昭
謀反詔四川雲南貴州建昌行都司各以所部軍討
之召遣人訟寃公移檄止所調軍具以事聞於上
遂直其寃經播州楊宣慰迎謁以銀器文綺來獻公
笑而却之宣德改元正月奉勅清理山西戎伍無有
苟免而濫加者十一月詔選御史有風力者體察南
京弊政推公復承命以往因有條奏上皆從之庚
戌上以蘇松等郡任郡守者弗得其人命大臣各
舉賢能者時都御史顧佐薦公知溫州府公至則視

民之利病政之得失而興廢之舊額田十畝以三畝
爲陸田俾輸麥稅其後田有賣買而民畏麥稅之重
造版籍莫肯收陸田者以故爭訟連年公請均陸田
之稅與水田等於是賦稅不虧民甚利之郡所屬四
縣稅課司河泊所舊征銀鈔旣而禁用金銀商稅止
輸鈔而舊課不除每歲役於官者買銀輸之民多破
產公以稅銀例禁請自今銀課亦皆收鈔朝廷從之
是後民無輸銀之苦舊徭役弗均富者得幸免公度
其貧富高下列爲簿籍而民獲其平溫地與金鄉盤
石等三衛隣軍士恃其不統於有司肆爲凶暴凌轢

有司侵刻小民公束之以法軍衛肅然每歲中使至
溫取供御海味果實供饋煩苛公措置有方民不病
而事集一日檄下作漕運巨艦四五十艘郡邑驚動
公任寮屬集耆老興工料董其事不一二月寂無勞
擾而艦成且以所餘物還下中貴官柴某以巨舟取
寶西洋諸國追還遇風舟泊海港入溫江瀕岸將起
其貨送京柴聲勢啖啖公處之裕如他政事有不便
於民者大則奏聞小則立改振舉學校使士有所作
興修明條制使吏有所遵守祠先賢舉逸民典禮讓
時嫁娶重喪葬具儲積別善惡居數月政化大洽山

無盜賊民寡詞訟境內稱治隣邑之民訟有不直者
亦赴訴焉公爲辯其曲直咸悅服去青田民葉孟圭
徐成皆邑大姓兩家故有怨成爲糧長以賦不時輸
縣遣孟圭督之孟圭欲因以報怨乃率五百人掠其
財壞其屋成訴於官三司調軍追捕公聞之曰洪武
初青田嘗反今以五百人之衆不服進捕逃入於山
林必激變又延及無辜乃遣人召孟圭及成至府諭
以禍福命孟圭以所掠還成爲葺其屋孟圭拜且泣
曰昨聞調軍追捕自謂旦暮鬼耳今聞指示可生之
路敢不從命人謂公片言止亂賢於用五百人遠矣

壬子冬十月入覲道經括蒼馮公嶺永嘉丞於見遣其子間道懷金贖公於旅館公慰諭却之過客聞其事者因扁所舍處曰却金館士大夫咸有題詠始公與八人受命爲守未朞月政聲燁然聞於京師至是上問吏部尚書郭璉曰先所任九人爲知府亦有來者乎璉以公等七人名聞乃召入便殿命中使傳詔獎勞錫宴於廷又以御製招隱詩賜之所以寵賚之者甚厚公旣復任感上寵遇知無不爲化行旣久民皆信服軍衛亦皆戒飭其下毋得侵害於民郡中無事黃堂闐然暇則詣庠序進諸生周旋等講論

經史亶亶忘倦又召生徒章綸入府親自授業未幾周旋果狀元及第章綸第進士今任禮部右侍郎其餘亦各出仕有廉名公之指教居多歲旱齋戒禱於山川泣拜移時不能起其禱詞有云薄壽請從今日止甘霖望自九天來俄而黑雲四興大雨如注歲大熟乙卯春處川盜起羣聚四出剽掠官軍討之往往敗乃於要害處設官防守俄有一人逸入境守關者執之乃殺官軍者也公詢知賊據烏風洞爲巢穴遣經歷黃能誠往捕之悉得其渠魁時都指揮使李貴等捕盜無所得乃執平民以火烙之皆自証服公移

文言已得盜彼所捕皆平民也貴等怒必欲置所執者於死公抗言不爲撓由是活二百餘人永嘉民朱良觀良旦兄弟爭財訟於郡公召其鄉長老諭以兄弟天倫大義因判詩於其狀有云祗緣花底鶯聲巧致使天邊雁影分之句朱良觀兄弟感泣退修親睦之行是歲五月浙江布政使黃澤以公治行聞於朝宣宗以璽書獎勵增秩二級掌郡事如故命下而禮部尚書胡濙復薦公宜大用乃擢刑部右侍郎將赴召溫之官吏軍民父老咸號泣遮留及出城男女送者萬餘人填塞城門居民在江之北者率父老童

穉望風拜伏悲泣於岸側在郡六年無錙銖取於民布裘疏食處之怡然民思之不已爲立生祠歲時祭祀及在朝數上章言事皆關於治體每朝廷有政事百官廷議公辯析利害衆皆服之論囚常求生之前後辯繫者之冤不可勝數又命典獄灑掃囹圄夏月則寬其桎梏正統元年九月詔往維揚理鹽法惟私販情重者罪之餘悉寬貸議者欲悉籍其家公力爭之全活者百餘家庚申八月朝議遣公經理京畿八府荒政多得賑濟之法初麓川思任發苦邊吏侵刻而叛都督方正討之敗死已而遣使入貢謝罪羣臣

復請討之公上書大略言麓川一彈丸地疆里不過數百人民不滿萬餘以大軍臨之往無不克然莫若命官軍耕守操備仍令官一員直入其地諭以禍福好生惡死人之常情一聞開示可生之路必稽首稱臣輿琛入貢若或冥頑梗化則相機剿絕如此遠人蒙再生之恩而朝廷亦免出師轉餉之勞詔百官會議時有欲邀功邊徼者倡言征之便卒以山川險阻弗能克兵疲於奔命民困於轉輸東南騷動衆始悔之辛酉六月旱詔公審覆在京罪囚多所平反凡可矜疑咸從輕議越數日天乃雨大有年上封事者言

民之盜竊者多黥刺之刑不足使之懲創自今犯者宜扁其門曰竊盜之家朝議從之公具言律有常憲竊盜初犯再犯俱刺字三犯者絞今於律條之外又加其罪况在京及各處布政司人烟輻輳爲盜者多若盡立牌額數年之間各處竊盜牌額頗多四方往來之人觀瞻實傷治體書奏乃寢其令時公以疾屢欲告歸而少師楊公士奇少保楊公溥勉留之且擬大拜公以疾力求罷上乃許之既歸杜門不出惟

課童僕畊墾教子讀書而已巳巳八月車駕北狩

邸邸攝位詔起之遂驛召於家既至以爲吏部左

侍郎時貴州蠻叛議討之公言貴州荒服之地洪武中命鎮遠侯提督鎮守夷人以安永樂中始奏以其地設都布按三司及府州縣夷人始苦之遂至作亂乞遵舊制仍設總兵官鎮守而革新設衙門北虜也先請遣大臣迎車駕還京廷議不決公倡言於衆曰此事雖十上章不得請不可已也於是自草奏同羣臣詣闕力請迎鑾輿南還公與有力焉明年陞本部尚書倦倦以進賢圖治爲心而好惡者不一公知不可力求退避三上章始獲命致仕既歸杜門養疾絕不與世事縣大夫有問侯者輒使人謝之竟弗見

天順元年四月十一日得疾諸子曰吾嘗爲溫守溫民戴吾亦深今去溫數十年然心未嘗不在溫也我死神氣必歸溫矣越三日正衣冠而坐索紙筆書口占律詩一首付長子宗投筆而逝公晚號鈍菴奏議牧民備用司刑備用書義庭訓四書講義禮記解義皆行於世



